

莊

子

通

繕性第十六

外篇

繕性於俗學以求復其初滑欲於俗思以求致其明
謂之蔽蒙之民

繕音擅滑音骨

人生而靜天之性也感於物而動性之欲也性自
完足無待於學善學者學以率其性可矣若如俗
學則矯揉之私智爾以是求復其初戕賊已甚去
之不愈遠乎情本順施無待於思善思者思當其
理可矣若如俗思則揣摩之私智爾以是求致其
明放析已甚去之不愈遠乎故謂之蔽蒙之民繕

性於俗下郭本又有一俗字廣本無之余觀文勢
宜無此字滑欲於俗一作滑欲於欲亦非

古之治道者以恬養知生而無以知爲也謂之以知
養恬知與恬交相養而和理出其性夫德和也道理
也德無不容仁也道無不理義也義明而物親忠也
中純實而反乎情樂也信行容體而順乎文禮也禮
樂徧行則天下亂矣彼正而蒙已德德則不冒冒則
物必失其性也

治平聲知音智夫音扶

古之治道者恬淡平夷而神明自照謂之以恬養
知又率性而生無用知有爲之迹謂之以知養恬

知與恬交相養是故無知而知矣而不知無爲而爲爲而不爲大用顯著而本體不虧無所於忤無所於逆和之至也一之精通合於天倫理之至也和理出於其性矣和故謂之德理故謂之道道德之名於是乎出德則際天蟠地化育萬物故謂之仁道則四達並流接而生時於心故謂之義義則心見於外而物來附之則有忠實之名中心純實而反其自得之情則有樂之名信行於容體之間而順乎自然之節文則有禮之名夫此曰仁曰義曰忠曰樂曰禮云者皆從道德中來雖本降而爲

末而不凜於末故足尚也世俗之所謂禮樂者則一體之所履一志之所樂華藻之具荒淫之器而與和理不相干此則禮樂之芻狗爾故天下從此亂矣彼羣生者莫不各正其性命而自家已德不必以此而冒彼也必爲德以冒之使人各棄已而從於我安得不失其性哉

古之人在混芒之中與一世而得澹漠焉當是時也陰陽和靜鬼神不擾四時得節萬物不傷羣生不夭人雖有知無所用之此之謂至一當是時也莫之爲而常自然逮德下衰及燧人伏戲始爲天下是故順

而不一德又下衰及神農黃帝始君天下是故安而不順德又下衰及唐虞始爲天下興治化之流淪淪散朴離道以善險德以行然後去性而從於心心與心識知而不足以定天下然後附之以文益之以博文滅質博溺心然後民始惑亂無以反其性情而復其初由是觀之世喪道矣道喪世矣世與道交相喪也道之人何由興乎世世亦何由興乎道哉道無以興乎世世無以興乎道雖聖人不在山林之中其德隱矣隱故不自隱

混昏上聲戲義同淪音驕以行下孟反知音智喪息浪反下同

在昔三皇以來玄古無號之君在混沌茫昧之中

與一世同其澹漠當是時也安所用其知哉此之
謂至一至燧人伏羲不能無爲始取天下而爲之
矣故天下以爲順帝之則而不復與道一矣至神
農黃帝又取天下而爲之矣故天下僅僅不危爾
而去順又遠矣又至唐虞取天下而爲之不務其
源而興其流離析道之名而稱其善其善險敗德
之名而稱其行其行然後去其真朴之性而從事
於有覺之心心與心識謀慮競起而知不足以定
之然後多爲之容饒廣爲之文章增爲之簡策煩
爲之制度所謂已而爲知者殆而已矣於是本質

埋湮而心靈壅溺使天下貿貿惑亂而無以友其
性情之初於是道與世始兩相夫而不附道自道
不可用於世世自世不復由夫道故世指道爲方
外而道詆世爲俗塵憂憂乎不入也若是則聖人
雖游於朝市而無所用之與山林何以異哉故曰
其德隱矣惟德隱於世而至人之名亦顯若玄古
以前舉世皆至人也誰稱至人者哉

古之所謂隱士者非伏其身而弗見也非閉其言而
不出也非藏其知而不發也時命大謬也當時命而
大行乎天下則反一無迹不當時命而大窮乎天下

則深根寧極而待此存身之道也

見音現知音智下同

承上文遂論隱古所謂隱士者非謂隱其身也非謂隱其言與知也適與時命相左而無由興其道於天下故稱隱也當時命而大行乎天下則反歸太一之途而混然大同登斯世於羲燧之前矣不當時命而大窮乎天下則深藏其本寧定其性而待時之至然後行雖在市朝人孰窺其際哉此至人之所以游於人間世而存身之道也

古之存身者不以辯飾知不以知窮天下不以知窮德危然處其所而反其性已又何爲哉道固不小行

德固不小識小識傷德小行傷道故曰正已而已矣

樂全之謂得志

樂音洛下同

承上文因論存身古之存身者不以浮華辯言而顯飾其知慧知自知爾何用昭昭然示人哉飾知則外將以繁多之迹毒天下而內亦累其道德之和故不爲也第危然獨居其所而反其性真已矣夫何爲哉蓋飾知者棄大而從於小者也大道蕩蕩而不小行至德巍巍而不小識小識小行虧損道德之由也是故至人不務務正已而已矣正已者自得而已矣自得者樂全而已矣

古之所謂得志者非軒冕之謂也。謂其無以益其樂而已矣。今之所謂得志者軒冕之謂也。軒冕在身非性命也。物之儻來寄也。寄之其來不可圉其去不可止。故不爲軒冕肆志。不爲窮約趨俗。其樂彼與此同。故無憂而已矣。今寄去則不樂。由是觀之。雖樂未嘗不荒也。故曰喪已於物。失性於俗者。謂之倒置之民。

儻吐黨反。圉音雨。爲音位。

因上文論得志。古之人不爲軒冕所榮而縱欲敗度。不爲窮約所窘而競俗求容。其樂窮約與樂軒冕同。若以寄去而不樂。則其所謂樂軒冕者樂荒。

淫而已矣。非自得之樂也。故曰喪已於物而失其性於俗。學俗思之務者。謂之倒置之民。

秋水第十七

外篇

秋水時至。百川灌河。涇流之大。兩涘渚崖之間。不辨牛馬。於是焉。河伯欣然自喜。以天下之美爲盡在已。順流而東行。至於北海。東向而視。不見水端。於是焉。河伯始旋其面目。望洋向若而歎曰。野語有之曰。聞道百。以爲莫已若者。我之謂也。且夫我嘗聞少仲尼之聞。而輕伯夷之義者。始吾弗信。今我睹子之難窮也。吾非至於子之門。則殆矣。吾長見笑於大方之家。

北海若曰井鼃不可以語於海者拘於虛也夏蟲不可以語於冰者篤於時也曲士不可以語於道者束於教也今爾出於崖涘觀於大海乃知爾醜爾將可與語大理矣

涇音經涘音侯虛音墟

天秋多雨百谷之水皆灌注於黃河通流盈滿兩涯之間遠不可辯牛與馬涇通也涘崖也涯際也渚洲也水中可居曰洲也河伯河神馮夷也旋四也洋海濶也若海神也虛小空也篤困也

天下之水莫大於海萬川歸之不知何時止而不盈尾閭泄之不知何時已而不虛春秋不變水旱不知

此其過江河之流不可爲量數而吾未嘗以此自多者自以比形於天地而受氣於陰陽吾在於天地之間猶小石小木之在大山也方存乎見少又奚以自多計四海之在天地之間也不似壘空之在大澤乎謂之萬人處一焉人卒九州穀食之所生舟車之所通人處一焉此其比萬物也不似豪末之在於馬體乎五帝之所連三王之所爭仁人之所憂任士之所勞盡此矣伯夷辭之以爲名仲尼語之以爲博此其自多也不似爾向之自多於水乎

泄音屑量音亮比音婢大音泰壘音立

暑空音孔稊音蹄處上聲

尾閭泄海之所海水沃之卽焦亦名沃焦壘空蟻
穴也稊草似稗而米甚細號物之數謂之萬物不
止萬而名物則云萬也卒衆也九州殷實之所養
舟車之所載其人卒不知幾億萬而斯人處其一
也蓋天地之中有四海四海之中有中國中國之
中有萬物萬物之中有人人之中有我至微細矣
取而譬之如大澤之中有壘空壘空之中有太倉
太倉之中有稊米稊米之中有馬馬之中有豪末
也而天下帝之所揖讓三王之所征伐仁人任士之

所憂然不出此豪末中矣。作夷辭此豪末以爲名
仲尼語此豪末以爲博此其自多也不似爾之多
秋水乎

河伯曰然則言大天地而小豪末可乎北海若曰否
夫物量無窮時無止分無常終始無故是故大知觀
於遠近故小而不寡大而不多知量無窮證曠今故
故遙而不悶掇而不跂知時無止察乎盈虛故得而
不喜失而不憂知分之無常也明乎坦塗故生而不
說死而不禍知終始之不可故也計人之所知不若
其所不知其生之時不若未生之時以其至小求窮

其至大之域是故迷亂而不能自得也由此觀之又何以知豪末之足以定至細之倪又何以知天地之足以窮至大之域

分去聲大知音智鼎音向擬專劣反說音悅

河伯曰據子所言則天地大豪末小矣以此定大小之名可乎北海若曰不可失物之器量無窮隨其所受之多寡而不見其盈溢物之時運無止隨其所遇之久暫而不見其斷際物之地位無常隨其所寓之貴賤而不見其定在物之終始無端隨其所變之生死而不見其新故是故大知之士觀遠察近則知小不爲寡稱情卽爲足足大不爲多

取適不在有餘、知量之無窮也。證今明古、則知萬古卽一日、不必厭其久。活一日卽萬古、亦不慕夫長生、知時之無止也。察乎盈虛、則知得亦儻然、不足以爲欣失、亦儻然、不足以爲戚。知分之無常也、明乎坦塗、則知生非吾生、新吾卽故吾、死非吾死、故吾卽新吾、知終始之無故也。計人之所知、於萬億無數物中、無一二爾。計人之生時、於萬億無數劫中、無須臾爾。而欲持此至小窮、彼至大故、精搖意喪、卒不可得。然則豪末果可以定、至細而天地果可以窮、至大乎安知不有細於豪末而大於天

地者哉。

河伯曰世之議者皆曰至精無形至大不可圍是信情乎北海若曰夫自細視大者不盡自大視細者不明夫精小之微也埤大之殷也故異便此勢之有也夫精粗者期於有形者也無形者數之所不能分也不可圍者數之所不能窮也可以言論者物之粗也可以意致者物之精也言之所不能論意之所不能察致者不期精粗焉。

埤音卑

河伯曰豪末不足以定至細之倪則世謂至精無形可以定至細之倪否天地不足以窮至大之域

則世謂至大不可圍可以窮至大之域否是信實乎北海若曰人之目力有所極而不能入無窮也從大視大庶幾可盡從細視大則目力幾何而能盡其宏遠之勢如蠡測海是也從細視細庶幾可明從大視細則目力粗略而不能精密分明如鵬視下是也精之爲言言乎其小之小也埤之爲言言乎其大之大也此猶異質而可辨何則未離於有境而非無義故也若夫無形則雖窮天下之數不能復分矣不可圍則雖窮天下之數不可復加矣此則不以形勢言而但以名數言不以目力得

而但以心意致若可以盡其形容矣顧人之言說亦有所極而不能入無窮可以言說得者猶物之粗法也人之心意亦有所極而不能入無窮可以心意得者猶物之精法也不離於法猶不足以盡至精至大之說也至於言之所不能論意之所不能致神口無所開其喙靈照無所庸其光若此者然後不可以精粗論直無而已無極之外復無極無盡之外復無盡而不知無極無盡也然後可以盡無形與不可圍之說也此物情也此道體也是故大人之行不出乎害人不為仁思動不為利不

賤門隸貨財弗爭不多辭讓事焉不借人不多食乎
力不賤貪汙行殊乎俗不多辟異爲在從衆不賤佞
諂世之爵祿不足以爲勸戮耻不足以爲辱知是非
之不可爲分細大之不可爲倪聞曰道人不聞至德
不得大人無已約分之至也

汙下孟反下同爲利去聲辟音僻約分去聲

大人知道無不在在卽非道故應迹無常而不離
於宗量等乾坤何所不愛而亦未嘗以仁愛自多
無不仁亦無仁也高尚其事未嘗爲利又混同榮
辱雖守門隸而不自以爲賤無不潔亦無潔也寡
欲知足豈爭貨利而亦不以辭讓爲多無不讓無

讓也適可而止不借人以興功不多食人之力而亦不避貪汙之名無不廉無廉也不染世塵皎皎與俗殊矣而又和光同塵不多辟異無不異無異也爲在從衆未嘗專已而又自然正直非賤佞諂無不可無可也世之爵祿不足以爲勸世之戮辱不可以爲阻不可得而榮不可得而辱不可得而親不可得而踈爲行如此蓋知是非之不可分細大之不可倪混然齊同而無迹可尋也故曰道人

不聞至德不得大人無已蓋無是非細大之分而約之以至於極惟極乎無形與不可圖故然也

河伯曰若物之外若物之內惡至而倪貴賤惡至而倪小大北海若曰以道觀之物無貴賤以物觀之自貴而相賤以俗觀之貴賤不在已以差觀之因其所大而大之則萬物莫不大因其所小而小之則萬物莫不小知天地之爲稊米也知豪夫之爲丘山也則差數觀矣以功觀之因其所有而有之則萬物莫不有因其所無而無之則萬物莫不無知東西之相反而不可以相無則功分定矣以趣觀之因其所然而然之則萬物莫不然因其所非而非之則萬物莫不非知堯桀之自然而相非則趣操觀矣昔者堯舜讓

而帝之噲讓而絕湯武爭而王白公爭而滅由此觀
之爭讓之禮堯桀之行貴賤有時未可以爲常也梁
麗可以衝城而不可以窒穴言殊器也騏驎驪騮一
日而馳千里捕鼠不如狸狌言殊技也鷗鵂夜撮蚤
察毫末晝出瞋目而不見丘山言殊性也故曰蓋師
是而無非師治而無亂乎是未明天地之理萬物之
情者也是猶師天而無地師陰而無陽其不可行明
矣然且語而不舍非愚則誣也帝王殊禪三代殊繼
差其時逆其俗者謂之篡夫當其時順其俗者謂之
義之徒默默乎河伯女惡知貴賤之門小大之家

鳥下同以差差數義茲反功分音續操平聲馬王去聲之行下孟反性音生舍二級

河伯曰如汝所言是非不可分小大不可倪則無貴賤小大矣然滿目前無非貴賤無非小大此貴賤小大爲在物之內乎爲在物之外乎從何處定北海若曰以道眼觀物物無貴賤貴賤一也天之生賤與其生貴同道之寄賤與其寄貴同無定也以物情觀物莫不以在己者爲貴以在人者爲賤亦無定也以俗趨觀物時貴時賤如市價之低昂不由駟僮不爾又物貴物賤如名利之榮辱不由人情不爾此亦無定也以品級觀之則無大小之

可言因人所欲大而大之則萬物莫不大因人所
欲小而小之則萬物莫不小如豪末本小謂與丘
山同大亦得以性足故天地本大謂與稊米同小
亦得以性無餘故本無定也以績業觀之則無有
無之可言因人所欲有而有之則萬物莫不有因
人所欲無而無之則萬物莫不無如東西相反本
無功也然非東無以形西非西無以形東謂之有
功亦可故曰功分定實無定也以好尚觀之則無
是非之可言因人之所是而是之則萬物莫不是
因人之所非而非之則萬物莫不非如堯以堯為

是桀爲非桀以桀爲是堯爲非知堯桀之自是而
相非可見萬物情趣皆如此亦無定也故均一讓
而或帝或絕均一爭而或王或滅吾安知爭者是
而讓者非乎讓者是而爭者非乎各是其是各非
其非各貴其貴各賤其賤存乎其時不可定也譬
梁麗工於衝城而拙於室穴騏驎長於千里而短
於捕鼠鴟鵂能於夜而不能於晝無定也若從是
而違非從治而違亂猶從天而違地從陰而違陽
皆滯色相徇人我之見與道不相應故曰汝惡知
貴賤之門小大之家

河伯曰然則我何爲乎何不爲乎吾辭受趣舍吾終
奈何北海若曰以道觀之何貴何賤是謂反衍無拘
而志與道大蹇何少何多是謂謝施無一而行與道
參差嚴乎若國之有君其無私德繇繇乎若祭之有
社其無私福泛泛乎其若四方之無窮其無所畛域
兼懷萬物其孰承翼是謂無方萬物一齊孰短孰長
道無終始物有死生不恃其成一虛一滿不位乎其
形年不可舉時不可止消息盈虛終則有始是所以
語大義之方論萬物之理也物之生也若驟若馳無
動而不變無時而不移何爲乎何不爲乎夫固將

化

趨舍音歷松行下孟反參初林反差初宜反矚音軫

河伯曰如汝所言則貴賤既無門小大既無家是
非治亂咸無定矣我之辭受趨舍必有所出不能
兩行也終當奈何北海若曰以道觀之本無貴賤
貴賤之名從反覆尋衍而得子毋拘執一定妄加
貴賤於其間今與虛通大道蹇蹇而不夷也本無
多少多少之名從代謝施用而起子毋拘執一定
妄加多少於其間今與變化之道參差而不齊也
必如國君之無私德若神明之無私福若天地四
方之無窮域兼懷萬物無私嫗翼是謂無方之大

德萬物之理一也。初無短長。大道無終始也。而物則有死生。死生者無窮之一變。爾非終始也。成之與毀。相爲對待。子母恃其成一虛一滿。惟其化之所之。而不守其一形。年有壽夭。時有延促。其來不可舉。而令之去。其去不可止。而令之住。消息盈虛。終則有始。循理直前。無勞措意。是所以語大義之方。論萬物之理也。萬物之變流動。無常安而待之。必將自化。何勞措意於其間哉。

河伯曰。然則何貴於道邪。北海若曰。知道者必達於理。達於理者必明於權。明於權者不以物害己。至德

水火不能熱水弗能溺寒暑不能害金獸不能賊非
謂其薄之也言察乎安危寧於禍福謹於去就莫之
能害也故曰天在內人在外德在乎天知天人之行
本乎天位乎得踳躅而屈伸反要而語極曰何謂天
何謂人北海若曰牛馬四足是謂天落馬首穿牛鼻
是謂人故曰無以人滅天無以故滅命無以得殉名
謹守而勿失是謂反其真行下孟反踳躅音擲濁落
絡同

河伯曰道之所貴於天下者爲其爲萬物極也如
子之言直任物耳道於是乎失其操矣然則何貴
於道而尊之邪北海若曰知道者必達於理達於

理者必明於權明於權者遇物之來不着不滯應而無迹過而弗有必不以外物而害已之真故至德者游於物而物不能傷非謂其迫之也迫水必溺迫火必焚迫寒暑必害迫禽獸必賊豈有幸哉言察乎安危定乎禍福謹乎去就而莫使其能害已也此不着不滯之效也故曰天在內人在外天者人之本然率性而有者也故在內人者人之不得不然因感而用者也故在外所謂德者謂其得夫天也非謂其得夫人也非不得夫人奉天而行之於人也故知天人之行者本乎天得乎德躋躋

而不可定屈伸而不可常是故可以及大道之云
而語真常之極矣此所以貴夫道也河伯曰何謂
天何謂人曰凡天生自然者謂之天人爲不自然
者謂之人如牛馬四足爲天終馬首牛鼻爲人
顧穿絡雖在於人而可穿可絡不知其所以然而
然者亦謂之天因天命而施人事則可以人事而
滅天命不可故曰無以人滅天無以故滅命得此
則謂之德德者自得之謂非名爲得之謂也若以
得而徇名不謂之德矣既得其得謹守而勿失則
天命皆我是謂及其真中庸開卷言天命之謂性

有人言孟子親受業於子思之門其解曰莫之爲而爲者天也莫之致而至者命也此解天命二字甚顯審如此則與莊子所稱天命何異要之大義原不出此學者其諦思之以上秋水一篇總是一意反覆有矩度可誦又曰莊子此種議論其詳見於齊物論中大與吾儒不同吾儒言事事物物各有定理湏好問好察而用其中所以說無適無莫又說義之與比故有精義之功不免於分別莊則不然只要不着不滯無適無莫而已更不論義此論是發揮喜怒哀樂未發之謂中一句所以謂之

性命宗不免語上而遺下然合於天道矣是曹點
之流見其大者佛氏之學亦如此

變憐虵虵憐蛇蛇憐風風憐目目憐心變謂虵曰吾
以一足跼蹐而行予無如矣今予之使萬足獨奈何
虵曰不然予不見夫唾者乎噴則大者如珠小者如
霧雜而下者不可勝數也今予動吾天機而不知其
所以然虵謂蛇曰吾以衆足行而不及予之無足何
也蛇曰夫天機之所動何可易邪吾安用足哉蛇謂
風曰予動吾脊骨而行則有似也今予蓬蓬然起於
北海蓬蓬然入於南海而似無有何也風曰然予蓬

蓬然起於北海而入於南海也然而指我則勝我
我亦勝我雖然夫折大木蜚大屋者惟我能也故以
衆小不勝爲大勝也爲大勝者惟聖人能之
飛同 反踔勑角反 唾上臥反 噴音問反 躡音促 折音哲 蜚

憐者愛尚之名 夔一足獸 螭百足蟲也 夔以多足
企少足故憐 螭以有足美無足故憐 蛇蛇以有
形企無形故憐 風風以有行企不行故憐 目目以
形用企神用故憐 心天地萬物皆稟自然明闇有
無無勞企美放而任之自合玄道倒置之徒妄心
希慕故舉 夔等以明天機之妙理也 踔跳也

嚶曰我以一足跳擲而行簡易無我如矣今子駢
馳萬足豈不勞哉蛇曰不然夫唾而噴者實無心
於大小而小大之迹自分或如珠或如霧散雜而
下其數難舉天機也今我衆足乃天機之自張有
同唾噴耳豈我能行之哉蛇謂蛇曰吾以衆足行
而遲子無足而速何也蛇曰夫天機之所動何可
易邪吾安用足哉郭子玄曰物之生也非知生而
生也則生之行也豈知行而行哉足不知所以行
目不知所以見心不知所以知惓然無心而自得
矣遲速之節聰明之鑒或能或否皆非我也或者

欲有其身而矜其能所以逆其天機而蕩其神器也蛇謂風曰予雖無足而行猶有象也予無象而鼓動無方何哉風曰予雖鼓動無方哉顧人以手指撝我我卽不能折以足躑躅我我亦不能折不能勝人也恣其天機無所與爭也雖然時而颺起折大木飛大屋者惟我能也此以衆小不勝爲大勝也譬達觀之士穢迹揚波混愚智於羣小之間民是非於罽塵之內而亭毒蒼生造化區宇同二像之覆載等三光之照燭御六氣之正變遨飛龍於無窮所勝孰大哉非聖人其孰能之蓬蓬風聲

蹈蹴踏也一作鮪爲藉蓋之義

孔子遊於匡宋人圍之數匝而弦歌不輟子路入見
曰何夫子之娛也孔子曰來吾語汝我諱窮久矣而
不免命也求通久矣而不得時也當堯舜而天不無
窮人非知得也當桀紂而天下無通人非知失也時
執適然夫水行不避蛟龍者漁父之勇也陸行不避
兕虎者獵夫之勇也白刃交於前視死若生者烈士
之勇也知窮之有命知通之有時臨大難而不懼者
聖人之勇也由處矣吾命有所制矣無幾何將甲者
進辭曰以爲陽虎也故圍之今非也請辭而退

匣子
令反

見音現語上聲知得知失音智父音甫咒音似難乃
旦反處上聲

命非已制雖彼蒼亦豈能制命哉固有制之者吾
無爲用心也安於命非中智以下事唯聖人能之
公孫龍問於魏牟曰龍少學先王之道長而明仁義
之行合同異離堅白然不然可不可困百家之知窮
衆口之辯吾自以爲至達已今吾聞莊子之言茫焉
異之不知論之不及與知之弗若與今吾無所開吾
喙敢問其方公子牟隱机大息仰天而笑曰子獨不
聞夫埴井之鼃乎謂東海之鰲曰吾樂與吾跳梁乎
并幹之上入休乎缺甃之崖赴水則接掖持頤蹶泥

則沒足滅跗還軒蟹與科斗莫吾能若也且夫擅一
壑之水而跨時埒井之樂此亦至矣夫子奚不時來
入觀乎東海之鰲左足未入而右膝已縶矣於是遂
巡而却告之海曰夫千里之遠不足以舉其大千仍
之高不足以極其深禹之時十年九潦而水弗爲加
益湯之時八年七旱而崖不爲加損夫不爲頃久推
移不以多少進退者此亦東海之大樂也於是埒井
之鼃聞之適適然驚規規然自失也且夫知不知是
非之竟而猶欲觀於莊子之言是猶使蚩負山商鉅
馳河也必不勝任矣且夫知不知論極妙之言而自

適一時之利者是非埒井之鼃與且彼方趾黃泉而
登大皇無南無北奭然四解淪於不測無東無西始
於玄冥反於大通子乃規規然而求之以察索之以
辯是直用管闕天用錐指地也不亦小乎子往矣且
子獨不聞夫壽陵餘子之學行於邯鄲與未得國能
又失其故行矣直匍匐而歸耳今子不去符忘子之
故失子之業公孫龍口呿而不合舌舉而不下乃逸
而走少去聲長上聲行下孟反知音智泮音芒與音
余喙音諱隱音印大音太埒音坎鼃音蛙樂音
洛幹古旦反亦音韓楚側救反音綯跣音附還音旋
軒音寒繫音執療音老爲去聲知不音智下同竟音
境下同矩音巨勝音升跣音此大音久奭音釋解音
蟹索所白反匍蒲北反呿音去

公孫龍徒以口舌勝人耳堅白同異六抵如天下
篇惠子之術於道無一當者喙口也埽井淺井蛙
蝦蟆幹井欄甃井中累塼跣脚跌還顧視虾井中
赤蟲科斗蝦蟆子腋臂下頤口下繫拘商鉅馬螭
也呿開也

莊子釣於濮水楚王使大夫二人往先焉曰願以境
內累矣莊子持竿不顧曰吾聞楚有神龜死已三千
歲矣王巾笥而藏之廟堂之上此龜者寧其死爲留
骨而貴乎寧其生而曳尾於塗中乎二大夫曰寧生
而曳尾塗中莊子曰往矣吾將曳尾於塗中

濮音卜
笥音似

陶隱居畫二犍牛以答詔一拘窘於鞭繩一優游
於水草亦此意先焉謂宜其言也藏之以笥覆之
以巾曰巾笥

惠子相梁莊子往見之或謂惠子曰莊子來欲代子
相於是惠子恐搜於國中三日三夜莊子往見之曰
南方有鳥其名鵩鵩子知之乎夫鵩鵩發於南海而
飛於北海非梧桐不止非練實不食非醴泉不飲於
是鵩得腐鼠鵩鵩過之仰而視之曰嚇今子欲以子
之梁國而嚇我邪

相去聲鵩音寬

搜於國中索而逐之也練實斫實也

莊子與惠子遊於濠梁之上莊子曰儵魚出遊從容
是魚樂也惠子曰子非魚安知魚之樂莊子曰子非
我安知我不知魚之樂惠子曰我非子固不知子矣
子固非魚也子之不知魚之樂全矣莊子曰請循其
本子曰女安知魚樂云者既已知吾知之而問我我
知之濠上也儵音條從音聰樂音洛

循其本反其初言也言多則失其本意必反其本
而後得言之情汝之初不曰女不知魚之樂而曰
女安知魚之樂是既已知吾知之而問我也昔之
然者神告之矣今反爲不神者求耶我之知魚

正知之此濠上耳。天地萬物一氣潛通。子非我而
知我。我非魚而知魚。豈形骸之所能隔。豈方類之
所能礙。觸目而理自流。舉念而意自得。矢口而言
自冥矣。子不必爲我而後知我。我豈待爲魚而後
知魚哉。知之濠上。猶言知之此處。言不遠也。詞鋒
圓妙。語絕意盡。惠子可與微言。辨壘旋破。濠水名
石絕水曰梁。全謂全不知也。李元卓曰。物之所同
者。同乎一一之所同者。同乎道。凡森布於貌象聲
色之間者。無不具此一性之分。充足無餘。一天之
遊逍遙。無累物與我成有焉。惟契物我之知者。不

期知而知其妙此莊子所以知魚樂也若夫出而
揚游而泳無濡沫之涸無網罟之患從容乎一水
之中者將以是爲魚之樂乎以是爲樂齊諧且知
之矣又奚待周而後知乎昔人嘗言之矣眼如耳
耳如鼻鼻如口無不同也在我者蓋如也視死如
生視富如貧視周如魚視人如豕視我如人在物
者蓋如也如則物物皆至游無非妙處奚獨濠梁
之上也哉如則物物皆真樂無非天和奚獨鯈魚
之樂也哉

天下有至樂無有哉有可以活身者無有哉今奚爲
奚據奚避奚處奚就奚去奚樂奚惡夫天下之所尊
者富貴壽善也所樂者身安厚味美服好色音聲也
所下者貧賤天惡也所苦者身不得安逸口不得厚
味形不得美服目不得好色耳不得音聲若不得者
則大憂以懼其爲形也亦愚哉夫富者苦身疾作多
積財而不得盡用其爲形也亦外矣夫貴者夜以繼
日思慮善否其爲形也亦䟽矣人之生也與憂俱生
壽者惛惛久憂不死何之苦也其爲形也亦遠矣列
士爲天下見善矣未足以活身吾未知善之誠也

誠不善邪。若以爲善矣。不足活身。以爲不善矣。足以
活人。故曰忠諫不聽。蹲循勿爭。故夫子胥爭之以殘
其形。不爭名亦不成。誠有善無有哉。今俗之所爲。與
其所樂。吾又未知樂之果樂邪。果不樂邪。吾觀夫俗
之不知樂。舉羣趣者。誣誣然如將不得已。而皆曰樂者。
吾未之樂也。亦未之不樂也。果有樂無有哉。吾以無
爲誠樂矣。又俗之所大苦也。故曰至樂無樂。至譽無
譽。天下是非果未可定也。雖然。無爲可以定。是非至
樂活身。唯無爲幾存。請嘗試言之。天無爲以之清。地
無爲以之寧。故兩無爲相合。萬物皆化。芒乎芴乎。而

無從出乎。苟乎芒乎而無有象乎。萬物職職皆從無
爲殖。故曰天地無爲也。而無不爲也。人也孰能得無
爲哉。

樂音洛篇內皆同處上聲惡鳥路反惜音昏蹲
音存誣音阮芒音荒忽下同

天下有至樂者無有哉。天下之所尊者富貴壽善
也。安逸厚味美服好色音聲也。然求聲色臭味而
不得則大憂以懼。此更以其所樂者爲累矣。富貴
者多事而不得息。壽者久憂而不得休。烈士殉善
以殺其身。此又以其所樂者爲累矣。若是而果可
謂之樂哉。旣謂之樂人宜懽忻鼓舞以往也。吾觀
世之爲富貴名壽者皆誣誣焉如趨死地而出於

不得已之狀然猶曰樂吾未信其爲樂也若我之
所爲樂者則在無爲而俗又以爲苦也就孰非
果何所定哉雖然天下無不以有爲殺身者而惟
無爲足以活身無爲之爲至樂明矣天以無爲故
清地以無爲故寧天地以無爲合故恍惚變化而
萬物生無爲者無不爲也可不謂至樂哉無爲者
天地之道也人與天地遠矣其孰能無爲哉忠諫
勿聽蹲循勿爭言不聽則勿賣耳誣與磬同碌碌
也職職繁殖貌

莊子妻死惠子弔之莊子則方箕踞鼓盆而歌惠子

曰與人居長子老身死不哭亦足矣又鼓盆而歌不
亦甚乎莊子曰不然是其始死也我獨何能無慊然
察其始而本無生非徒無生也而本無形非徒無形
也而本無氣雜乎芒芴之間變而有氣氣變而有形
形變而有生今又變而之死是相與爲春秋冬夏四
時行也人且偃然寢於巨室而我噉噉然隨而哭之
自以爲不通乎命故止也

長丁丈反噉古弔反音叶

聞死感慊人之常情莊子獨非人乎顧其觀化之
心素熟回頭一轉衷心頓微是以鼓盆而歌不失
其常也鼓盆而歌非易悲爲喜亦非假物遣累只

是不失其常而已。李漢老因哭子而問大慧以爲不能忘情恐不近道。大慧曰：子死不哭是豺狼也。此莊子所謂惡能無繫也。蓋形氣之始悉本於無雜乎芒芴之間，有氣有形而情識愛樂因此焉出。親姻眷屬由此焉成，然以宇宙大觀揆之，則百年須臾之寄耳。惑者認以爲實緣，情生愛，因愛生貪，滋長業緣，生死纏縛，害形損性，一何愚哉！真人痛憫凡迷，方便開喻，謂天下之物生於有，有生於無，須以毒眼覷破，使無一毫障礙。青天白日，萬古靈靈，何容憂喜於其間乎？列子載魏有東門吳者，其

子死而不哭人問其故曰吾嘗無子無子之時不
憂今子死與向無子同吾何憂焉亦得此意矣巨
室指天地噉叫同呼也人子之於父母如上世不
葬其親親死則舉而委諸壑當時不以爲不孝念
不及於葬埋也故曰黃帝之時民有親死不哭而
人不非者然至於其顙有泚則直性之發必不容
已雖於他人之父母亦然而况已之父母乎故曰
是其始也惡能無慙是天理人情之至必不容已
者也孟子之所以命夷之者正在此處作大機關
輕輕一轉雖方外之士亦云仙人是忠孝人做莊

子若無此兩句此神鬼之所必誅天地之所不載者何以爲莊子其下所云却浮游於萬物之祖以大父母之命壓人兒女子之心似大義滅親一般道理直當如此有人讀此書謂莊子多了此兩句好漢只宜一刀兩段如龍女獻珠何用擬議愚却以爲不然如此人說正是吳起母死不奔喪殺妻求將手段惡稱大道故道在幾微毫眇之間差不得些小儒者謂之時中莊子謂之變化不直死殺一向做莊子所以發無情之論者只爲世人情多故諄諄若一向無情便亂道且此無情之論亦無

奇特庄家老子都會說死是死的頭路活是活的頭路終不成大家哭死了此是口頭言語没人毀謗却致疑於莊子之言是何見解有人臨生死際握兒女妻妾手悲啼不已人必以爲不達彼其兒女妻妾漠然無徬徨悲踊之意人又以爲非人此處看得道理正在天理人情之間差不得毫釐支離叔與滑介叔觀於冥伯之丘崑崙之虛黃帝之所休俄而柳生其左肺其意歷歷然惡之支離叔曰子惡之乎滑介叔曰亡予何惡生者假借也假之而左生者塵垢也死生爲晝夜且吾與子觀化而化及

我我又何惡焉

滑音骨虛羸同肘音帚履音貴惡鳥路反

黃帝之所休謂嘗休息於此柳生肘間怪徵也死
兆也然吾方觀物之化而化今及我卽死何憾喪
化而盡已矣郭子玄曰斯皆先示有情然後尋至
理以遣之若云我無情故無憂則夫有情者遂自
絕於曠遠之域而迷困於憂樂之境矣楊大年好
禪有八角磨盤之說後爲內召大旨便溺俱下朱
子譏其八角磨盤果安在哉止可笑他學力不濟
不可謂八角磨盤非也學力到濟甚難曾子啓手
足尚訖戰兢兢今而後方免此聖賢不欺語滑

介叔柳生左肘意歷歷然惡之亦是人情只是道人一撥便轉不撥無何亦轉

莊子之楚見空髑髏髑髏有形擿以馬捶因而問之曰夫子貪生失理而爲此乎將子有亡國之事斧鉞之誅而爲此乎將子有不善之行愧遺父母妻子之醜而爲此乎將子有凍餒之患而爲此乎將子之春秋故及此乎於是語卒援髑髏枕而臥夜半髑髏見夢曰子之談者似辯士諸子所言皆生人之累也死則無此矣子欲聞死之說乎莊子曰然髑髏曰死無君於上無臣於下亦無四時之事從然以天地爲春

秋雖南面王樂不能過也莊子不信曰吾使司命復
生子形爲子骨肉肌膚反子父母妻子間里知識于
欲之乎髑髏深瞋蹙頰曰吾安能棄南面王樂而復
爲人間之勞乎髑髏音獨樓蹙苦亮反攢苦弔反遺
音位枕去聲見音現從音繼瞋音頰
頰音遏復扶又反

人之所以有大患者爲吾有身也若吾無身則吾
何患人死則不待衣以爲寒不待食以爲饑徒有
空知存如日月之在天地間何資物哉無資則無
患南面王樂何以過此今請以小喻大有虜中逃
回者悔其始之逃而更欲亡之虜中人問曰復汝

妻子父母閭里知識而更欲亡之虜何也對曰虜
中文法寬疎但有射獵馳騁已矣今吾還中國而
征輪求索之繁仰事俯育之累四集於我我何以
爲生以是思虜中樂耳然則彌懷之不願復生也
其意豈異是哉故曰望其曠畢如也宰如也墳如
也鬲如也則知所息矣人胥知生之樂未知生之
苦知老之憊未知老之佚知死之惡未知死之息
也莊子此論與佛氏輪迴之說異至理自當如是
若佛氏輪迴真是粘皮帶骨之論未足信也莊佛
不同處在此髑白骨有枯形也撥旁擊也捶馬校

也從縱同

顏回東之齊孔子有憂色子貢下席而問曰小子敢問回東之齊夫子有憂色何邪孔子曰善哉女問昔者管子有言丘甚善之曰褚先生不可以懷大綆短者不可以沒深夫若是者以爲命有所成而形有所適也夫不可損益吾恐回與齊侯言黃帝堯舜之道而重以燧人神農之言彼將內求於已而不得不得則惑人惑則死且女獨不聞邪昔者海鳥止於魯郊魯侯御而觴之於廟奏九韶以爲樂具大牢以爲膳鳥乃眩視憂悲不敢食一嚙不敢飲一杯三日而死

此以已養養鳥也。非以鳥養養鳥也。夫以鳥養養鳥者，宜栖之深林，遊之壇陸，浮之江湖，食之鰕鰕，隨行列而止，委蛇而處。彼唯人言之惡聞，奚以夫譊譊爲乎？咸池九韶之樂，張之洞庭之野，鳥聞之而飛，獸聞之而走，魚聞之而下，人卒聞之，相與還而觀之。魚處水而生，人處水而死，彼必相與異其好惡，故異也。故先聖不一其能，不同其事，名止於實，義設於適，是之謂條達而福特。女音汝，下同。縹格猛反。御音迂五。駕反。迎也。鰕里轉反。壇本作漣音。

但水沙也。食音嗣。鰕鰕音秋。條行音杭。委音煨。蛇音移。譊音鏡。還音旋。處上聲。好惡去聲。

聖人因時變化，不一其能，與物委蛇，不同其事，名

止於實不貴非實之名義設於適不爲非義之義
故萬事條達而諸福總持道上古聖智之事於庸
主之前反求而不解其謂必且以爲謾罔罪不細
矣此則吾之不量未可盡言其不聰也

列子行食於道從見百歲髑髏擗蓬而指之曰唯予
與汝知而未嘗死未嘗生也若果養乎予果歡乎種
有幾得水則爲鼃得水土之際則爲蠃蟷之衣生於
陵屯則爲陵舄陵舄得鬱棲則爲烏足烏足之根爲
蟛蠹其葉爲蝴蝶蝴蝶胥也化而爲蟲生於竈下其
狀若脫其名爲鵽掇鵽掇千日爲鳥其名爲乾餘骨

乾餘骨之沫爲斯彌斯彌爲食醯願輅生乎食醯黃
輅生乎九猷瞽芮生乎腐蠶羊奚比乎不尊久竹生
青寧青寧生程程生馬馬生人人又反入於機萬物
皆出於機皆入於機音弱音獨樓機音蹇養上聲種
蛙蟻駢頻二音屯音豚焉音昔輅其俱反輅丁活反
輅音干沫音未醯許分反願音移輅音路輅音光瞽
音茂芮音睿蠶音權比音婢尊字并同

髑髏雖死彼自知其不死故列子曰惟予與爾知
爾未嘗死未嘗生也養心憂不定貌詩云憂心養
養言汝果死而憂乎予果生而樂乎一氣之在天
地無所不之化爲萬類不可勝計或以無情相生

或以有情相生或以無情生有情或以有情生無情或一形而數變或數形而一變或死而更生或生而反死而形生之主未嘗斲滅是以聖人知生非我生死非我死是造物者握爐鞴之機不出不得不生機入不得不死也雖當其死而其靈燭不昧者存然則死者風火假合之形耳果可謂之死哉故雉之爲蜃雀之爲蛤壤蟲假翼川蛙翻飛水虜爲蛤荇苓爲蛆田鼠爲鴛腐草爲螢蠹之爲虎蛇之爲龍又若牛哀成虎楚姬爲鼃秦女爲石椁離爲柳死而更生男女易形其爲變化亦何限乎

此一段分明卽釋氏六道輪迴之說。但輪迴從心性因緣上來。此從形體因緣上來。嘗觀三惡道中苦趣。學人急急要解脫。若莊子言。似皆出於自然。不必迴避。其說孰是。蓋輪迴之說。佛爲衆生說是。出世法中之世間法也。若發最上乘心者。不必壞輪迴。不必不壞輪迴。身處汙泥中。也是蓮花。學人只管心地乾淨。不必問他去處。去處亦自主張不得。所以孔子說。未知生。焉知死也。反劉爲鑿。今爲繼言。萬物雖有朕兆。得水土氣乃相繼而生也。得水土之際。言物在水土際布在水中。就水上視。

不見抄之可得。如張縣在水中謂之鼃蛭之衣也。阜也。物因水成而陸產生於陵屯則爲陵鳥車前草也。陵爲得鬱。栖則爲烏足。鬱栖蟲名。烏足草名。俗呼墨草。烏髯方用之。烏足之根爲蟬蟪蜋也。其葉爲蝴蝶蛺蝶也。亦名胥也。一草而根葉異化也。蝴蝶化而爲蟲。生於竈下得熱氣而化。其狀初出形潔若脫。其名爲鵲。鵲撥千日化爲鳥。曰乾餘骨。乾餘骨之日中片爲蟲。曰斯彌斯彌化爲食醢。若酒上蟻蠊也。願輅黃輓九猷皆蟲名。蠶亦蟲名。一名守瓜。一名忿鼠。羊奚草名。根似蕪菁。青寧蟲。

名羊奚與久竹比合而生也青寧形似刺蝟俗云
敗竹園多刺蝟是也程豹之白者秦孝公時有馬
生人蓋五運六氣觸物感變難以致詰也

達生第十九

外篇

達生之情者不務生之所無以爲達命之情者不務
知之所無奈何養形必先之物物有餘而形不養者
有之矣有生必先無離形形不離而生亡者有之矣
生之來不能却其去不能止悲夫世之人以爲養形
足以存生而養形果不足以存生則世奚足爲哉雖
不足爲而不可不爲者其爲不免矣夫欲免爲形

莫如棄世。棄世則無累。無累則正。正則與彼更
生。更生則幾矣。事奚足棄而生矣。足遺棄事則形不
勞。遺生則精不虧。夫形全精復。與天爲一天地者萬
物之父母也。合則成體。散則成始。形精不虧。是謂能
移精而又精。反以相天。離去聲。夫音扶。幾平聲。相去聲。

養生者必務養形。養形者必務爲世。故多累多累
而何生之能養。可謂不達矣。達生之情者。衣取蔽
形。食取充虛。世間剩餘之物。生之所無以爲者也。
不務也。如其達命之情。則又知生之必死死之必
生死於此又生於彼。循環不窮。此理之常而苟竊

竊焉必欲留而生遂此知之所無奈何者也不務也今夫養形必先之物然物有餘而形不養者有之矣有生必先無離形然形不離而生已亡者有之矣然則聚物以養形豈非生之所無以爲者乎豈知生之來非我所能却其去非我所能留知之所無奈何有命存焉而世人欲以養形存之不亦謬乎養形既不足以存生又何必僕僕焉爲世人之累而務生之所無以爲也不足爲而以爲不可不爲者正不免爲形役耳如欲免爲形役莫如棄事而遺生棄事而遺生則無塵勞之累無塵勞之

累則其心坦然乎澄然正與造物遊而變化日新
故累日去而新和日生幾於道矣夫事何以當棄
生何以當遺也棄事則四體寧謐而形不勞遺生
則真純內完而精不虧若是則形全精復與天爲
一矣蓋天地者萬物之父母也絪縕妙合則成有
生之體分散變化又成他生之始真人形全精復
與彼更生則聚散由我不由造化去來條然出有
入無是謂化移矣豈特能移而已乎精而又精皇
天且將顧之以爲助掞陰陶陽滌日月之光而幹
宇宙之機可也不但能移其一身而已也由此言

之養形不如達生達生則生自我存而命亦自我立矣

子列子問關尹曰至人潛行不窒蹈火不熱行乎萬物之上而不慄請問何以至於此關尹曰是純氣之守也非知巧果敢之列居予語汝凡有貌象聲色者皆物也物與物何以相遠夫奚足以至乎句先是色而已則物之造乎不形而止乎無所化夫得是而窮之者物焉得而止焉彼將處乎不淫之度而藏乎無端之紀遊乎萬物之所終始一其性養其氣合其德以通乎物之所造夫若是者其天守全其神無外物

奚自入焉。夫醉者之墜車，雖疾不死，骨節與人同而
犯害與人異，其神全也。乘亦不知也，墜亦不知也，死
生驚懼不入乎其胷中，是故遇物而不懼，彼得全於
酒而猶若是，而況得全於天乎？聖人藏於天，故莫之
能傷也。

知音智居音姬語去聲遠去聲物焉音州卻
隙同遲音悟悟音轉

不雜不瀉，曰純。天地之運，萬物之變，有情無情，不
離乎氣。至人全其純氣，磅礴鬱烈，故隱顯惟意而
無所不可，非智巧果敢之例也。凡有貌象聲色者，
皆物也，均是物類，即相懸不過尋丈間耳。誰稱至
乎？若夫不色不形者，造形色者也。無變無化者，化

萬物者也。惟先是色者爲能始物於不形而終物於無所化。此元氣也得是而窮之者。物安得而制焉。故當獨往獨來。乘正御變。宅心於不淫之度。藏身乎無端之所。游於萬物終始出入之門。一其性。養其氣。合其德。以通於太上始物之境。其天守完全。而神無間隙矣。物奚自而入焉。彼得全於酒者。猶忤物而不懼。况得全於天者乎。孟子言養氣在乎集義。從心性上用工夫。莊列言養氣在於窮元氣之初。從天命上用工夫。此世出世間之別。先是色而已。上下似有脫誤。李元卓曰。天下一車爾。託

而乘其上者內閒知見之營營外逐幻化之擾擾
一將傾覆於諸妄之地非直骨節之傷驚懼之入
也一開其受萬態俱入猶醒者之覩車覆得無傷
乎雖然探形之始天地與我並生原數之先萬物
與我爲一奚物而謂車奚物而謂人奚物而謂墜
奚物而謂傷且心與物對則開人而天心與物冥
則離人而天機械去而所循者天理也適莫融而
所體者天均也行而無跡是謂天游動而無畛是
謂天機無憂者天樂無美者天和相天而無助也
事天而無役也夫是之謂全於天

復讎者不折鎡于雖有伎心者不怨飄瓦是以天下
平均故無攻戰之亂無殺戮之刑者用此道也不開
人之天而開天之天開天者德生開人者賊生不厭
其天不忽於人民幾乎以其真機鎡音莫伎音至幾音

于將鎡鋏與讐爲用然報讐者報其人而未嘗報
其器不之折也飄落之瓦至於中人雖有伎心者
亦莫之怨也皆以其無心故爾執此道以御世而
天下平均矣聞天之天者以性遇物其究至於德
生開人之天者以情遇物其究至於賊生老子曰
以智治國國之賊不以智治國國之德是也故不

厭其天而固守其初不忽於人而無動於欲雖在
凡民亦幾乎至人之道矣

仲尼適楚出於林中見痾僂者承蜩猶掇之也仲尼
曰子巧乎有道邪曰我有道也五六月累丸二而不
墜則失者錙銖累三而不墜則失者十一累五而不
墜猶掇之也吾處身也若槲株拘吾執臂也若槁木
之枝雖天地之大萬物之多而惟蜩翼之知吾不反
不側不以萬物易蜩之翼何爲而不得孔子顧謂弟
子曰用志不分乃凝於神其痾僂丈人之謂乎

音縷蜩音條掇丁活反累音誅錙音之銖音珠處上聲槲音掘木段也株音朱槲株拘言若槲株之拘糾

以五六月之巧累死至於二三五而不墜處身執
臂若株若槁而不動心惟蜩翼之知雖天地之大
萬物之多而不與易用志不分如此與神何異古
語云巧者不過習者之門在專心致志而已矣
顏淵問仲尼曰吾嘗濟乎觴深之淵津人操舟若神
吾問焉曰操舟可學邪曰可善游者數能若乃夫沒
人則未嘗見舟而便操之也吾問焉而不吾告敢問
何謂也仲尼曰善游者數能忘水也若乃夫沒人之
未嘗見舟而便操之也彼視淵若陵視舟之覆猶其

車却也覆却萬方陳乎前而不得入其舍惡往而不
暇以瓦注者巧以鉤注者憚以黃金注者殫其巧一
也而有所矜則重外也凡外重者內拙操七曹反下
章同數音朔
覆音福下同惡音烏殫音昏

數習也善游者心與水忘加以數習之功而舟可
操也若夫善沒者未嘗見舟而卽能操之無待數
習而自能蓋没人視淵若陵視舟之覆於淵猶車
之却於坂覆却雖多而不以經懷自知無死地其
忘水又有大焉者故無所遇而不閑暇何難於操
舟大抵所要愈重則所矜愈深而心愈惛欲養生

全內者惟窮理達命雖萬死而有不死者存無所
矜重而一出於閑暇可矣以物賭射曰注意所主
也

田開之見周威公威公曰吾聞祝賢學生吾子與祝
賢遊亦何聞焉田開之曰開之操拔簪以待門庭亦
何聞於夫子威公曰田子無讓寡人願聞之開之曰
聞之夫子曰善養生者若牧羊然視其後者而鞭之
威公曰何謂也田開之曰魯有單豹者巖居而水飲
不與民共利行年七十而猶有嬰兒之色不幸遇餓
虎餓虎殺而食之有張毅者高門縣簿無不走也行

年四十而有內熱之病以死豹養其內而虎食其外
殺養其外而病攻其內此二子者皆不鞭其後者也
仲尼曰無入而藏無出而_易柴立其中矣三者若得
其名必極夫畏述十殺一人則父子兄弟相刑也必
盛卒徒而後敢出焉不亦知乎人之所取畏者衽席
之上飲食之間而不知爲之戒者過也腎市軫反拔
蒲未反鐸音
咸單音善縣音玄畏途險道也知音智

鞭其後策其所不及也守一方之事而不及於會
通之適皆不鞭其後者也藏既內矣而又入之此
過入也陽既外矣而又出之此過出也若禍木之

無心而惟中是立則名極而實當也夫畏途十殺
一爾便大畏之至於飲食男女之害動之死地而
莫不冒之斯過之甚也人莫躓於山而躓於堙得
非以山爲戒而堙爲不足畏乎火烈人望而畏之
則避者衆水弱人狎而近之則溺者衆所謂不鞭
其後者也是故衽席之上飲食之間日夜兢兢而
後可此聖人所以有座右之銘也按當作較全羽
也音拂等帚也薄簾也

祝宗人玄端以臨牢筴說蕝曰汝奚惡死吾將三月
懔汝十日戒三日齋藉白茅加汝肩尻乎彫俎之上

則汝爲之乎爲彘謀曰不如食以糠糟而錯之牢筴
之中自爲謀則苟生有軒冕之尊死得於豚楮之上
聚僂之中則爲之爲彘謀則去之自爲謀則取之所
異彘者何也齊音策豕欄也說音稅惡去聲憐音患
齊音齋藉音謝况苦余反殂音阻爲彘
音位下自爲爲彘同食音嗣錯音措豚音篆楮舞上
聲僂音呂

昔人有欲觀加九錫者願減年而就死人心之下
齊如此不大可笑取豚楮雕俎也聚僂謂殯於藪
塗蔓妻也

桓公田於澤管仲御見鬼焉公撫管仲之手曰仲父
何見對曰臣無所見公友談詒爲病數日不出齊士

有皇子告敖者曰公則自傷鬼惡能傷公夫忿滴之
氣散而不反則爲不足上而不下則使人善怒下而
不上則使人善忘不上不下中身當心則爲病桓公
曰然則有鬼乎曰有沈有履竈有髻戶內之煩壤雷
霆處之東北方之下者倍阿魍魎躍之西北方之下者
則泆陽處之水有罔象丘有岑山有夔野有傍徨澤
有委蛇公曰請問委蛇之狀何如皇子曰委蛇其大
如轂其長如轅紫衣而朱冠其爲物也惡聞雷車之
聲則捧其首而立見之者殆乎霸桓公戰然而笑曰
此寡人之所見者也於是正衣冠與之坐不終日而

不知病之去也

諛論音哀臺隱音烏音齋音額上上聲忘去聲沈俗作沈水干也後神名居

音結竈神着赤衣狀如美女倍音裴鮪音姓竈音能

倍阿神名鮪狀如小兒長一尺四寸黑衣赤帶大

冠帶劍持戟失音逸洪陽豹頭馬尾罔象狀如小兒

赤黑色赤爪大耳長臂舉音華狀如狗有角文身五

采嬰音癸狀如鼓而一足方皇音傍惶狀如蛇兩頭

五平文委音煨蛇音移惡烏路反鞭噴上聲大笑貌

見鬼則以為祟言霸則以為祥喜勝而憂忘憂忘

而病去以妄止妄尚能收效而况以真滅妄者乎

褚玄英曰桓公因疑而致疾則藥不能痊告教以

妄而止妄遂不藥而效則知鬼之有無由心之起

滅而心有好惡又人之忘情也忘情去則好惡得

其真本心明則起滅不由彼今人之逐妄喪真皆

見鬼而成疾者也。告敖之言曰：公則自傷，鬼惡能傷公。斯治病之良劑歟？蓋戲瓦出而心痛除，弓影去而疑病愈，信能澄心滌覽，虛白內融，一塵莫留，萬境莫撓，則鬼何由而見？病何由而入哉？諛詒氣逆之病，皇氏告敖名忿滴滿聚也。

紀渚子爲王養鬪雞。十日而問雞已乎？曰：未也。方虛憍而恃氣。十日又問曰：未也。猶應嚮景。十日又問曰：未也。猶疾視而盛氣。十日又問曰：幾矣？雞雖有鳴者，已無變矣。望之似木雞矣。其德全矣。異雞無敢應者，反走矣。

消音醜所景反爲去聲憍音驕景音影幾平聲

虛憍恃氣軒昂夸大無實而自矜也聞響而動見影而起心猶爲物所移也疾視而盛氣神王氣堅而若不忘欲奮之意然形則不動矣至於雞鳴不變彼命敵而我不應灰心搞形忘勝忘負此非古之不爭而善勝者乎雞已乎列子作雞可鬪已乎憍高也仰頭也昔南唐求緩師遣徐鉉來宋以鉉善辯求一當之者不可得太祖曰吾得之矣臨期擇一木訥武人充館伴使凡鉉有言皆不答第唯唯耳鉉爲之輟談夫此乃假木雞也而猶爾况真木雞乎

孔子觀於呂梁縣水三十仞流沫四十里鼃鼃魚鼃之所不能游也見一丈夫游之以爲有苦而欲死也使弟子並流而拯之數百步而出被髮行歌而游於塘下孔子從而問焉曰吾以子爲鬼察子則人也請問蹈水有道乎曰亡吾無道吾始乎故長子性成乎命與齊俱入與汨偕出從水之道而不爲私焉此吾所以蹈之也孔子曰何謂始乎故長乎性成乎命曰吾生於陵而安於陵故也長於水而安於水性也不知吾所以然而然命也

縣音玄並音傍蒲浪反長丁夫反汨胡忽反

磨翁而旋入者齊也回伏而涌出者汨也吾生於

呂梁之陵而安爲臣梁之人不復他遷於物此吾之故也長於水際而日與水游不思不勉內性安之故曰性也雖然吾能從水不知其所以能從水莫之爲而爲天實爲之故曰命也

梓慶削木爲鐻鐻成見者驚猶鬼神魯侯見而問焉曰子何術以爲焉對曰臣工人何術之有雖然有一焉臣將爲鐻未嘗敢以耗氣也必齊以靜心齊三日不敢懷慶賞爵祿齊五日不敢懷非譽巧拙齊七日輒然忘吾有四肢形體也當是時也無公朝其巧專而外滑消然後入山林觀天性形軀至矣然後成見

鏐然後加手焉不然則已則以天合天器之所以疑
神者其是與

鏐音鏐齊音同譽平聲朝音潮滑音滑
見音現與平聲

郭子玄曰公朝若無跋慕之心絕矣必取其材中
者不離其自然也蓋因物之妙故疑鬼神所作耳

鏐樂器似夾鐘

東野稷以御見莊公進退中繩左右旋中規莊公以
爲文弗過也使之鉤齊而反顏闔遇之入見曰稷之
馬將敗公密而不應然焉果敗而反公曰子何以知
之曰其馬力竭矣而猶求焉故曰敗

見音現中音衆

御中規繩如織組文繡使之回旋如鉤百往百返

皆復故迹也馬力已竭而猶求焉故知必敗明神之不可勞也

工倕旋而蓋規矩指與物化而不以心稽故其靈臺一而不狃忘足僂之適也忘要帶之適也知忘是非心之適也不內變不外從事會之適也始乎適而未嘗不適者忘適之適也

倕音垂堯工人也稽音雞要腰同知音智

倕工倕任指之旋而蓋乎規矩蓋則畫與之合而不露也指物相得若化之自然不待心之稽考故其靈臺一而不拘礙吳道子畫佛像圓光一筆而就亦如此適安也會合也是非兩忘此中心之安適

也。內境純一而無所變。雖與事接而不知其所從。此心與理會而無不安適也。始乎適而未嘗不適者。初尚有適之情。久則併與適忘也。此之謂直適。有孫休者。踵門而託子扁慶子。曰。休居鄉不見謂不脩。臨難不見謂不勇。然而田原不遇。歲事君不遇。世賔於鄉里。逐於州部。則胡罪乎天哉。休惡遇此命也。扁子曰。子獨不聞夫至人之自行邪。忘其肝膽遺其耳目。茫然彷徨乎塵垢之外。逍遙乎無事之業。是謂爲而不恃。長而不宰。今汝飾知以驚愚。脩身以明汙。昭昭乎若揭日月而行也。汝得全而形軀具而九竅

無中道夭於壘盲跛蹇而比於人數亦幸矣又何暇
乎夫之怨哉子往矣孫子出扁子入坐有間仰天而
歎弟子問曰先生何爲歎乎扁子曰向者休來吾告
以至人之德吾恐其驚而遂至於惑也弟子曰不然
孫子之所言是邪先生之所言非邪非固不能惑是
孫子所言非邪先生所言是邪彼固惑而來矣又奚
罪焉扁子曰不然昔者有鳥止於魯郊魯君說之爲
具太牢以饗之奏九韶以樂之鳥乃始憂悲眩視不
敢飲食此之謂以已養養鳥也若夫以鳥養養鳥者
宜棲之深林浮之江湖食之以委蛇則平陸而已矣

今休歎啓寡聞之民也。吾告以至人之德。譬若載鼙以車馬。樂鵠以鐘鼓也。彼又惡能無驚乎哉。說救鵠反。扁符珍反。難乃旦反。賓音摯。惡音烏。下同。長上聲。知音智。跛彼我反。說音悅。鵠音位。樂音洛。下同。委音煨。蛇音移。舊如字。謂委蛇泥鰻也。歎啓如字。鼙音兮。鵠音晏。

忘其肝膽。則五藏皆虛。遺其耳目。則六塵不入。故彷徨塵外。逍遙無爲。率意自爲。非恃而爲之也。任其自長。非宰而長之也。海鳥之喻。譏淺見不可語大道也。歎空也。啓開也。如空之開。所見小也。